

TUTÚ NÍ CADÚHA TÉ SÀNTIAÚ

Té Sàntiaú cádúha-dé tutú quíhíⁿ ndaha ñáyiú isràél nchìté nuu ñihì ñuyíú

1 ¹Yúhú té Sàntiaú xínú cuèchi-í núú Yă Ndiöxí ndihí núú Xítóhó Jesucristú, te tèe-í tnúhu-a quède ndee iní ñáhà-í xii nchòhó ñáyiú isràél nchìté nuu ñihì ñuyíú-a.

Yá Ndiöxí táxí-gă sá xìní tnùní-ó

²Te nchòhó ñáyiú ndècu ndihí-í ichi Xítóhó Jesucristú, ío cudíí ìní-ndó cùndecu-ndo cuèi náí cùu sá ùhú véxi cuèndá-ndó, ³chi ducaⁿ te cutnùní iní-ndó sã sàndáá ndisa iní-ndó-gă, te cunduu càhnu iní-ndó cuèi náí ná yáha-ndo. ⁴Te cunduu càhnu-ni iní-ndó te ducaⁿ te cuu-ndo ñáyiú váha, te cundáá-ndó núú Yă Ndiöxí, te ducaⁿ te ñá túú-gă ná cumání-ndó núú-gă.

⁵Te núu cùmání sã xìní tnùní-ó, te cacăⁿ-ó núú Yă Ndiöxí te mee-gă taxi-gá, chi ío váha iní-gá, te ñá túú cùnini iní-gá núú-ó. ⁶Te ni yùhu ni iní-ó cacăⁿ-ó núú-gă, te quindáá ndisa iní-ó sã táxí-gă sá cúmání quiní tnùní-ó, te vá cání ìⁿ caní úú iní-ó. Chi nchaa ñáyiú sàni ìⁿ sani úú iní-xi cùú-yu dàtná ndute làmár cuáháⁿ-xi duha cuáháⁿ-xi dàcáⁿ nàá-xi òré quéné tǎchí. ⁷Te nchaa ñáyiú ducaⁿ sàni iní-xi, te vá cání ìní-yu sá ñihí-yu sá xìcáⁿ-yu núú-gă. ⁸Chi nchaa ñáyiú sàni ìⁿ sani úú iní-xi ñá cùtnùní iní-yu ndèdacàa sá sání ìní-yu cadá-yu.

⁹Te nchaa ñáyiú ndàhú ñáyiú ndècu ichi-gá, xìní ñuhu-xi ñá túú-gă ná caní iní-yu, mee-nă cudíí ìní-yu, chi Yá Ndiöxí chíndèe ñaha-gá xií-yu. ¹⁰Te nchaa ñáyiú cuica xìní ñuhu-xi cundecu váha iní-yu núú Yă Ndiöxí cuèi náí ná yáha-yu. Chi ñáyiú-áⁿ cúú-yu dàtná itá nchaa cùhú sã ñá túú cùdíi naha. ¹¹Chi òré ní cuu níhi cahni nchícanhii, te ní dádìí-ni-xi nchaa cùhú cuíí-ǎⁿ te ní cóyo-ni nchaa itá-xi, te ñá túú-gă cáá vìi. Te ducaⁿ sǎtnahá-xi cùu ñáyiú cuica chi núú chíúⁿ-ñí-yu xìhí-yu.

Nchaa ñáyiú quède cahnu iní-xi nchaa sá yáha-yu

¹²Te váha táhú nchaa ñáyiú quède cahnu-ni iní-xi cuèi nándi sá yáha-yu ndècú-yu ichi Yá Ndiöxí, chi òré ná ndíhí nchàa xíǎⁿ yáha-yu, te cuáñaha Yă Ndiöxí ìⁿ coróná váha vìhi cundecu ndihí-yu, te ndáá chi ducaⁿ càháⁿ

SANTIAGO 1

Yă Ndiöxí sá táxí-gă xii nchaa nchoo ñăyiu ñùhu iní ñáhá xii-gá. **13**Te nchaa ñáyiu sàni iní-xi cada nándi sá cuèhé sá dúhá, te vá cání iní-yu sá Yă Ndiöxí táuchìuⁿ-gá ducaⁿ càdá-yu, chi Yá Ndiöxí ñá quíu te caní iní-gá cada-gá ìⁿ sá cuèhé sá dúhá, te ni ñà túú tàuchiuⁿ-gá sá dúcáⁿ càdá-yu. **14**Te cuíní-yu cadá-yu nchaa sá cuèhé sá dúhá chi ducaⁿ vëxi iní-yu. **15**Te nchaa ñáyiu ío ñùhu iní nchaa sá cuèhé sá dúhá te quidé-yu, te núu na càda-ní-yu te cuíta nihnú-yu.

16Te nchòhó ñáyiu ío cùu iní-í ndécú ndìhi-í ichi Xítóhó Jesucrìstú, vá dǎná-ndó mèe-ndo dandahú ñáhá ñăyiu xii-ndo. **17**Chi nchaa sá vǎha véxi-xi núú Yă Ndiöxí Yaá ndécú àndiu, chi diu mee-gă ní cadúha-gá andiu ndìhi nchaa chódíní, ndìhi yóó, ndìhi nchícanhii. Te Yá Ndiöxí ñá túú ndì queheⁿ ndì queheⁿ-gá sá cání iní-gá, te ni ñà túú cùu-gá dàtná ìⁿ cuándáhú cuǎháⁿ-xi duha cuǎháⁿ-xi dácáⁿ, chi ìⁿ-ni sǎ sání iní-gá. **18**Te Yá Ndiöxí ní cuíní-gá sá cúú-ó dëhe-gá, te ndáá sá cúú-ó dëhe-gá chi sàndáá iní-ó tnùhu-gá. Te nchoo ñáyiu sàndáá iní-xi tnùhu-gá cúnùu-gá-ó chi ní nduu-o dëhe-gá.

Ichi ndáá cuiti

19Te nchòhó ñáyiu ío cùu iní-í ndécú ndìhi-í ichi Xítóhó Jesucrìstú, cundedóho-ndo ìⁿ tnùhu na càháⁿ-í-a. Te cuíní-í sá cùndecu túha-ndo cundedóho-ndo tnùhu Yá Ndiöxí, te caní váha iní-ndó nàcuáa cáháⁿ-ndó, te cunduu càhnu iní-ndó te vá cúdëéⁿ-ndó. **20**Chi núu na cùdëéⁿ-ó te ñá túú quide váha-o núú Yă Ndiöxí. **21**Te dañ-ndo nchàa sá cuèhé sá dúhá ìo ñuyíú-a. Te quindáá iní-ndó tnùhu Yá Ndiöxí ndécú ndìhi-ndo, te vá cùndùu sáá iní-ndó, te ducaⁿ te naníhí tàhú-ndó.

22Te quindáá iní-ndó tnùhu-gá te vá cuëndá-ni cundedóho-ndo, chi núu na cundedóho-ndo te vá tníí-ndó ñá, te dícó-ni dandahú-ndó mèe-ndo te vá naníhí tàhú-ndó. **23**Chi nchaa ñáyiu dícó-ni sàcundedóho tnùhu-gá te ñá túú sàndáá iní-yu, ñáyiu-áⁿ cúú-yu dàtná ìⁿ ñáyiu sàcúndéhé-ní núú-xi núú yùtátá. **24**Chi nini ndèhé-yu ní xiní-yu núú-yu, te ní xócání-yu te ní nacuanaa-ní-yu nàcuáa càa núú-yu. Te ducaⁿ sǎtnahá-xi cùu ñáyiu sàcúndedóho tnùhu Yá Ndiöxí, te ñá túú tníí-yu. **25**Te nchaa ñáyiu dàcuaha ndisa tnùhu ní dándöo Yá Ndiöxí nihnu-ní-yu ichi-gá, chi ñá díú ìⁿ sá vëe cùu-xi. Te ñáyiu-áⁿ ñà túú dícó-ni sàcúndedóho-yu chi quide ndáá-yu núú-gă, te cùdíí iní-yu xindecú-yu.

26Te nchaa ñáyiu càchí sá ndécú ichi ndáá te cùtexínu-ni càháⁿ-yu, te xíáⁿ dícó-ni dandahú-yu mèe-yu sá ndécú-yu ichi ndáá. **27**Te núu ndècu-o ichi ndáá cuiti ichi Dútú Ndiöxí, te chindee-o nchàa ñáyiu ní ndóo ndàhú, ndìhi ñáyiu quèé ndécú ndìhi tnúndòho tnùhu ndàhú, te vá cadá-ó nǎndi sá cuèhé sá dúhá ìo ñuyíú-a.

Īⁿnuu-ni cùu iní-ó nchàa tnahà ñáyi-u

2 ¹Te nchòhó ñáyi-u ndècu ndìhi-í ichi Xítóhó Jesucrìstú Yáa cúnùu, Īⁿnuu-ni cǎháⁿ ndìhi váha-ndo nchàa tnahà ñáyi-u-ndo. ²Te núu núu nátàcá-ndó chĩñuhu-ndo Yá Ndiöxí ní sáá Īⁿ tée ío váha càa dóo níhnú-dě, te ní sáá tucu Īⁿ tée ñihnu dóo ndàhú, ³te núu tée ñihnu dóo vǎha-ni-áⁿ néhé-ndó sǎ yĩñùhu núu-dě, te taxinucóo-ndo-dě Īⁿ núu xilé váha, te tée ndàhú-áⁿ daxòcáo-ndo-dě Īⁿ xio àdi canucóo-ndo-dě núu ñúhú, ⁴te núu ducaⁿ na càda-ndo te ñá túú quide váha-ndo. Chi Īⁿ-ni-dé cúú ìní-ndó, te Īⁿ-dé ñá túú cùu iní-ndó.

⁵Te nchòhó ñáyi-u ío cùu iní-í ndécú ndìhi-í ichi Xítóhó Jesucrìstú, chí cùndèdóho tucu tnúhu na càháⁿ-í-a. Yá Ndiöxí càháⁿ-gá vǎi ñáyi-u ndàhú cuèndá tnahá tnúhu ndìhi ñàhá-yu xii-gá, te ndècu váha-gá-yu dàcúxí ñáyi-u cuica ñáyi-u ñá túú sàndáá iní tnúhu-gá, chí ní cachí-gá sá ncháá ñáyi-u na cùu iní ñáhá xii-gá nduu táhǔ-yu cundecú-yu ndìhi-gá ní caa ní quíhíⁿ. ⁶Te nchòhó, ñá túú nèhe-ndo sá yĩñùhu núu ñáyi-u ndàhú, chí núu ñáyi-u cuica-ni nèhe-ndo sá yĩñùhu. ¿Te náa ñá cùtnùní iní-ndó sǎ ñáyi-u cuica dándoho ñaha-gá-yu xii-ndo, te cǎndeca ñàhá-yu sàháⁿ núu cuè tée cùchiuⁿ-áⁿ? ⁷Te ñi-u-ní-yu ío càháⁿ cuèhé-yu cuèndá Xítóhó Jesucrìstú, te nchòhó sa ní nduu-ndo dèhe-gá.

⁸Te Īⁿ ndudú cúnùu-gá ní cáháⁿ Yǎ Ndiöxí ní ngódó tnùní núu tütú-gá càchí-xi sá cúú ìní-ó tnahà ñáyi-u-o dàtná cúú ìní-ó mèe-o. Te núu ducaⁿ na càda-o te quide váha-o. ⁹Dico núu ñá túú cùu iní Īⁿnuu-o cuè tnahà ñáyi-u-o, te cuu cuéchi xii-o chí ñá túú quide-o nacuaá càháⁿ Yǎ Ndiöxí. ¹⁰Te núu Īⁿ ñáyi-u ndàunihnu Īⁿ sá càháⁿ Yǎ Ndiöxí, te ñava-ni quidé-yu ña, te ñáyi-u-áⁿ ñá túú quidé-yu nàcuáa càháⁿ ndudú Yǎ Ndiöxí. ¹¹Te Yá Ndiöxí ní cachí-gá sá tée ndècu ñadìhí-xi vǎ càháⁿ ndìhi-dé ingá ñadìhí. Te ñi-u-ni-gá ní cachí-gá sá vǎ cáhni-ó tnahà ñáyi-u-o. Te cuèi ñá túú càháⁿ ndìhi-o ingá ñadìhí, te núu sàhni-o tnahà ñáyi-u-o te ñá túú quide-o nacuaá càháⁿ ndudú Yǎ Ndiöxí. ¹²Te nchoo xini ñuhu-xi cáháⁿ-ó tnúhu váha te cada ndáá-ó, chí ñá díú Īⁿ sá vèe cùu-xi sá ñí cachí Yǎ Ndiöxí cada-o. Te mee-gǎ ní cachí-gá sá cádá ndǎá-gá cuéchi-o na sàá nduu. ¹³Te nchaa ñáyi-u ñá túú cùndahú iní tnahà ñáyi-u-xi, te vǎ cùndàhú iní ñáhá-gǎ xii-yu na sàá nduu càda ndáá-gá cuéchi-yu. Te nchaa ñáyi-u cùndahú iní tnahà ñáyi-u-xi te Yá Ndiöxí cùndàhú iní ñáhá-gǎ xii-yu na sàá nduu-ǎⁿ.

Quindáá iní-ó Yǎ Ndiöxí te cada váha-o

¹⁴Te nchòhó ñáyi-u ndècu ndìhi-í ichi Xítóhó Jesucrìstú, te núu càchí-ó sǎ sàndáá iní-ó Yǎ Ndiöxí te ñá túú quide-o sá vǎha, te ñá túú ndèe nándìhí-xi, chí vǎ nánihí tǎhú-ó te núu ducaⁿ na càda-o. ¹⁵Te núu ndèhe-o

iiⁿ tnaha ñáyi-u-o ñà túú dõ-yu àdi ñá túú sã cunchitó-yu, ¹⁶te xãhaⁿ-o: “Núhú-n te nducu-n dõó cuihnu-n te nducu-n sã cáxí-n”, xãhaⁿ-o, te ñá túú ñã sãñaha-o, te sá dúcáⁿ quide-o te ñá túú quide váha-o. ¹⁷Te núu cãchí-ó sã sãndáá iní-ó Yã Ndiõxí te ñá túú quide váha-o ndècu-o, te vèdana nãndíhi-xi.

¹⁸Te ió ñáyi-u cãchí-yu sá sãndáá iní-yu Yá Ndiõxí, te ió ñáyi-u cãchí-yu sá méé-ní sã vãha quidé-yu. Te yúhú cãchí-í sá núu ñá túú quide-o sá vãha, te ñá túú sãndáá iní-ó Yã Ndiõxí. Te nchoo quide-o sá vãha núu xiãⁿ cútnùní iní-ó sã sãndáá iní-ó-gã. ¹⁹Te ió ñáyi-u cãchí sá iiⁿdii-ni Yá Ndiõxí ndécú, te váha-ni cãháⁿ-yu. Te tnàhá yucu ñãvãha ndíhi nchaa espíritú cúndíhi-xi xiní-xi sá ndécú iiⁿdii-ni Yá Ndiõxí, te yúhú-xi dico ñá túú tnè-xi tnúhu-gã. ²⁰Te ió nii ðíquí-ó te núu na cãchí-ó sã sãndáá iní-ó Yã Ndiõxí, te vá cádá-ó sã vãha. ²¹Te ñaní tnàhá-ó ndíi Àbrahám téé ní xíndecu ndéé sanaha ñí ngúndecu váha ndíi núu Yã Ndiõxí, chi ní xito ndéé ñáhã-gã xii ndíi núu ndisa sá cáhni ndíi déhe ndíi té Isàác nduu táhú-gã ní cùu, te dàvá-áⁿ ñí cutnùní iní-gã sá ño sãndáá iní ñáhã ndíi xii-gã, núu ñá ní dàña-gã cahni ndíi déhe ndíi. ²²Te naha-o sá ndíi Àbrahám ñá díú-ní sã méé-ní sã ni sãndáá iní ñáhã ndíi xii-gã, chi ní tni ndíi tnúhu-gã. ²³Te ducaⁿ ñí quee ndáá-xi nãcuáa cãháⁿ-xi núu tütú Yã Ndiõxí núu cãchí-xi: “Ndíi Àbrahám ní sãndáá iní ndíi ní quide ndíi nchaa nãcuáa ní xãhaⁿ Yã Ndiõxí, te ní ngúndecu váha ndíi núu-gã, te ní cachí-gã sá cúu ndíi iiⁿ téé ió váha tnàhá tnúhu ndíhi-gã”, duha cãchí-xi núu tütú-gã.

²⁴Te xiãⁿ cútnùní iní-ó sã ñá díú mèe-ni sá quèndáá iní-ó Yã Ndiõxí, chi núu na càda-o nãcuáa cuu váha iní-gã te ngúndecu váha-o núu-gã ²⁵dàtná ní quide-gã tá Ràháb iiⁿ ñadíhi ní xíndecu ndéé sanaha, chi xíchí-ãⁿ ñí xíndecu-xi ichi díí ñí, dico ní tuha-xi ichi Yá Ndiõxí te ní ngúndecu váha-xi núu-gã, chi ní chindee-xi cuè téé isràél cue téé ní xica chiùⁿ-gã, te ní sanu ichi ñaha-xi xii-güedé iiⁿ ichi núu vã nãñíhi ñáhã cuè téé cùu úhú iní ñáhã xii-güedé. ²⁶Te nchaa ñáyi-u cãchí sá sãndáá iní Yã Ndiõxí, te ñá túú quidé-yu nãcuáa cãháⁿ-gã ñáyi-u-áⁿ cúú-yu dàtná iiⁿ ñáyi-u ní xíhi. Chi ñá túú-gã ndíxí tũu iní-yu nchaa sá cuèhé sá dúhá quidé-yu. Duha sãtnahã-xi cùu nchaa ñáyi-u ñá túú cuíni tni tnúhu cãháⁿ Yã Ndiõxí.

Nãcuáa quide yaa-o

3 ¹Te nchòhó ñáyi-u ndècu ndíhi-í ichi Xítóhó Jesucristú, vá ncháá-ndó càni iní-ndó cùu-ndo mestrú dacuàha-ndo ñáyi-u tnúhu Yá Ndiõxí chi íi cáá-xí. Chi na quítnahã nduu nãcuáha-o cuèndá núu-gã, te núu ñá túú ní quide ndáá-ó ñá, te vá cúu vãha iní-gã núu-ó. ²Te nchaa-o ño cuèhé sã ñá túú vãha quide-o. Te nchaa ñáyi-u ñá túú cãháⁿ tnúhu cuèhé tnúhu duha cùú-yu ñáyi-u ñá túú ñã cúmãní chi ió ndáá quídè-yu. Te xini-yu cotnií-yu

mèé-yu, te quìde váha-yu núú Yă Ndiöxí. ³Te dàtná cuìní-ndó cùu ììⁿ quiti te núu na chìhi-o frenú yuhu-di, te cotnii-o-di te ngúnu ichi-di, te ducaⁿ sãtnahá-xi cùu ñáyiu sàcótñii mee-xi, chi ñá túú càháⁿ-yu tnúhu cuèhé tnúhu duha. ⁴Te dàtná cuìní-ndó cùu barcú cuèi ñàhnu vihi-xi, dico òré quéné ñihi táchí te tündaha-xi ììⁿ xio, dico téé dàcaca ndacu-dé dáquìhíⁿ-dé-xi ndihi ììⁿ yutnu sá dánàni-güedé tímú ndàa núú càchí iní-dé quíhíⁿ-xi. ⁵Te ducaⁿ cùu tucu yaa-o chi ío líhli-xi dico ío cuèhé tnúhu càháⁿ-ó ndìhi-xi. Te ducaⁿ-ni sãtnahá-xi cùu tucu sá lúhá ñùhú chi sàhmi-xi ììⁿ yucu. ⁶Te diu-ni ducaⁿ sãtnahá-xi cùu yaa-o chi ío cuèhé tnúhu cuèhé tnúhu duha càháⁿ-ó ndìhi-xi, te dàcuíta nihnu ñaha-xi xìi-o. Te ío cuèhé cuèchi quìde-o ndìhi-xi cuendá sá ñùyíú-a ñùhu tnahá ñùhú tñi yucu ñávãha dàticá nihnu ñaha-xi. ⁷Te ndacu-o càda masú-ó nchàa núú quiti ìò ñuyíú cuèi quiti dééⁿ quiti xìca núú ñùhú, te cuèi quiti ndàva, te cuèi cóó, te cuèi quiti ñùhu xití ndute làmár, chi ducaⁿ quìde dava cue téé ñuyíú-a. ⁸Dico yàa-o chi vá yõ ììⁿ ndàcu cada masú ñáhá xì-xi nacuaá cáháⁿ-ó mèe-ni tnúhu váha ndìhi-xi, chi mee-ni tnúhu cuèhé tnúhu duha cùnuu-gá càháⁿ-ó ndìhi-xi. Te cùu-xi datná ììⁿ venènú chi dàti-u-xi iní-ó. ⁹Te diu-ni ndihi yàa-o quide cahnu-o Dútú Ndiöxí Yaa cúú Tãtã-ó, te diu-ni ndihi yàa-o caháⁿ úhú-ó cuè tnahã ñáyiu-o. Te xìni ñuhu-xi vá dúcãⁿ càda-o, chi mee-gã ní chihi-gá sá xìní tnùn-ó ndìhi iní-ó, dàtná cáá mèe-gã ñùhú iní-gá. ¹⁰Te diu-ni yuhu-o quèe tnúhu váha càháⁿ-ó, te diu-ni yuhu-o quèe tnúhu cuèhé tnúhu duha. Te nchòhó ñáyiu ndècu ndìhi-í ichi Xítóhó Jesucrístú cunaha-ndo sã ñà túú ndùu váha-xi ducaⁿ càda-o. ¹¹Te ñá túú xìní-ndó sã ììⁿ núú quèé ñihni ndute, te quèe ndute váha te quèe ndute úá-ãⁿ. ¹²Te nchòhó ñáyiu ndècu ndìhi-í ichi Xítóhó Jesucrístú, te ñá túú xìní-ndó sã ììⁿ yutnu ngúxí, te cùuⁿ aceitúná, àdi xìní-ndó sã ììⁿ yoho yaha stilé te cùuⁿ ngúxí. Te ducaⁿ cuèi ììⁿ núú quèé ñihni ndute, vá cúú quèe ndute váha te quee ndute úhá. Te ducaⁿ sãtnahá-xi cùu yuhu-o chi vá cúú càháⁿ-ó tnúhu váha te cáháⁿ-ó tnúhu cuèhé tnúhu duha.

Nchaa sá vãha xìní tnùn-ó tàxi Yá Ndiöxí

¹³Te núu ndècu ñáyiu túha tnuú-ndó ñáyiu cùtnuní iní-xi, te xìni ñuhu-xi mee-ni sá vãha cadá-yu, ducaⁿ te cutnùn-í iní-ó sã tũha ndisá-yu, te vá cadá càhnú-yu mèé-yu. ¹⁴Te núu nchoo cuèdú iní-ó te cuìní-ó cùnuu-o núú tnahã ñáyiu-o, te vá càchí-ó sã tũha-o, chi ñá túú quìde ndáá-ó te núu ducaⁿ na càda-o. ¹⁵Chi ñá díú xĩãⁿ ní dànehé ñáhá Yă Ndiöxí, chi ñuyíú iha ní cacu nihnu-xi cuendá sá yùcu ñávãha dàcahu iní ñáhá-xí. ¹⁶Te núú ndécú ñáyiu cuèdú iní ñáyiu cuìní cunuu, te yacãⁿ mee-ni ndãhú nàa xĩndecú-yu, te ñá túú quìde váha-yu, chi mee-ni nchàa sá cuèhé sá dúhá quidé-yu. ¹⁷Te núu ní taxi Yá Ndiöxí sá xìní tnùn-ó, te cada váha-o, te

cáháⁿ ndihí váha-o nchàa tnaha ñáyi-u-o, te tñi-o tnũhu váha càháⁿ-yu, te cundàhú iní-ó-güè-yu te chindee-ö-yu, te vá cání ìⁿ caní úú iní-ó, te ío cunduu ndáá iní-ó. **18**Te núu cuení-ó ñà túú ñă cuu cundecu-o ñùyíú-a, te cada váha-o sã cúú-xí tnàha ñáyi-u-o cuendá sá ñà túú ñă cuu cundecu-o ndihí-yu. Te ducaⁿ te nguínchicúⁿ dava-gá tnàha ñáyi-u-o càda váha-yu.

Vá cúú cundecu-o ichi Yá Ndiöxí te cada-o nãndi sá cuèhé sá dúhá

4 ¹¿Te xíní-ndó ñă cuendá nàa ñáyi-u te xisahni tnàhá-yu-ãⁿ? Te nàa-yu sá tnũhu cuédú iní, chi ñi-u-ni xíãⁿ ñũhú ìní-yu, te ñá túú ndècu váha iní-yu. ²Chi cuení-yu cundecu ndihí-yu ìⁿ sá ñà túú ndècu ndihí-yu, te ñá túú ñihí-yu núu xíãⁿ xícuu cuédú iní tnáhã-yu, te xícuehé tnáhã-yu, te càni tnahá-yu, te xisahni tnàhá-yu. Te ñá túú ñihí-yu sá cuení-yu chi ñá túú xìcáⁿ-yu núú Yá Ndiöxí. ³Te cuèi xìcáⁿ-yu ìⁿ sá cuení-yu núú-gã te ñá túú sãñaha-gã, chi ñá túú xìcáⁿ-yu ìⁿ sá cúú xìí-yu sá vãha, chi ìⁿ sá ná ndihí-yu núú cáda-yu nchaa sá cuèhé sá dúhá xìcáⁿ-yu, núu xíãⁿ ñá ñihí-yu. ⁴Te nchaa ñáyi-u ducaⁿ xíquide ío cùu sáá iní-yu núú Yá Ndiöxí. Te nàha-ndo sá ncháá ñáyi-u cùdí ìní-xi cundecu ichi cuèhé ichi duha cùu úhú iní-yu Yá Ndiöxí, chi vá cúú cundecu-o ichi cuehé ichi duha, te cundecu-o ìchi-gá. ⁵Te ñá túú dìó ducaⁿ càháⁿ-xi núú tütú Yá Ndiöxí núu càchí-xi: “Yá Ndiöxí ní taxi-gá Espiritú-gá ndécú ndihí-o. Te Espiritú-gá-áⁿ cuení-xi sá méé-ní-gã cuhuⁿ iní-ó”, duha càchí-xi núú tütú-gá. ⁶Te Yá Ndiöxí ío chindee ñaha-gá cuendá cada ndáá-ó nũú-gã dàtná càchí tucu-xi núú tütú-gá núú càchí-xi: “Yá Ndiöxí ñá túú cùu váha iní-gá núú nchaa ñáyi-u quide cahnu mee-xi, dico chindee-gá cue ñáyi-u ndàhú iní-xi”, duha càháⁿ-xi núú tütú-gá. ⁷Te cada-ndo nàcuáa càháⁿ Yá Ndiöxí. Te vá cáda-ndó nàcuáa cuení yucu ñãvãha, ducaⁿ te xóo cóo ndéé ñáhã-xí xì-ndo. ⁸Te tñi-ndo tnũhu càháⁿ Yá Ndiöxí te cundecu ndihí ñaha-gã xii-ndo. Te nchaa nchòhó ñáyi-u ndècu ichi cuehé ichi duha dañã-ndo ìchi-áⁿ te cada váha-ndo. Te nchaa nchòhó ñáyi-u sàni iní cunu cuechi nũú Yá Ndiöxí te quide-ni-ndo nchaa sá cuèhé sá dúhá, te ñá túú quide váha-ndo nũu ducaⁿ, chi xìni ñuhu-xi sá càcáⁿ-ndó nũú Yá Ndiöxí sá ná ndádá ndòo ndada nine-gá iní-ndó. ⁹Te ndixi cuèchi iní-ndó nchaa sá quidé-ndó ndèè ndáhyú ndisa-ndo sã ndihú iní-ndó, te ñá díú dà cudí ìní-ndó. ¹⁰Te náhmã-ndó nũú Yá Ndiöxí nchaa sá ñi quide-ndo, te ngúndecu váha-ndo nũú-gã.

Vá càháⁿ-ó nchaa sá quidé tnàha ñáyi-u-o

¹¹Te nchòhó ñáyi-u ndècu ndihí-í ichi Xítohó Jesucristú, vá cuátnũhu tnaha-ndo, chi nchaa ñáyi-u sãtnũhu tnaha dicó-ni ndàa nuú-yu ndèhe tnahá-yu, te ñá túú càháⁿ váha-yu cuendá tnũhu Yá Ndiöxí sá sánú ichi ñaha xíí-yu nàcuáa cundecú-yu, chi dàquee tíhũ-yu tnũhu-áⁿ. Te núu

càchí-ndó sã ñà túú càháⁿ váha tnúhu Yá Ndiöxí, te xíãⁿ quéé-xí sã ñà túú sàndáá iní-ndó tnúhu càháⁿ-gá, te cuení-ndó cùnuu tnúhu-ndo núú tnúhu-gá. ¹²Te mee Yá Ndiöxí ní cachí-gá nàcuáa cada-o, te diu-ni mee-gã càháⁿ-gá te núu ní quide váha-o, àdi ñà túú ní quide váha-o. Te diu-ni mee-gã dàcácu nihnu ñaha-gã xii-o núú ùhú núú ndàhú, te diu-ni-gá daquihíⁿ ñáhá-gã xii-o núú ùhú núú ndàhú-áⁿ te núu vá cádá vaha-o. Te nchoo ñà túú ñã cúú-ó, te núu mee-ni nchàa sá quidé tnàha ñáyi-u-o cùndehe-o.

Ñá túú cùnuni iní-ó ñasa túndaá-ó ìngá nduu

¹³Te dava nchòhó càchí-ndó sã vítná àdi tneé quíhíⁿ-ndó ìⁿ ñuú, te yacáⁿ cundecu-ndo ìⁿ cuía cada-ndo ìⁿ ndáhú te níhí-ndó díhúⁿ. ¹⁴Te ni ñã xíní-ndó ñã cúú sã yáha-ndo vitna àdi tneé. Te nchoo cùu-o datná ìⁿ vícú núhú, chi vícú-ãⁿ tnàvíí ndéhé-ó te tna tnaa-gá sa ní ndoñúhú-xí. Ducaⁿ sãtnahá-xi cùu nchoo chi ìⁿ úú nduu duha vëxi-o ñùyíú-a te ndoñuhu-o. ¹⁵Te núu sàndáá iní-ó Yá Ndiöxí te duha cáháⁿ-ó: “Te núu Ndiöxí ná càchí-gá sá cùndecu tnaa-o ñuyíú-a te cada chiuⁿ-o”, duha cachí-ó. ¹⁶Dico mee-ndo chi ío ñí iní-ndó cuení-ndó cùnuu tnúhu-ndo núú Yá Ndiöxí, te ñà túú ndùu váha-xi sá dúcáⁿ quide-ndo. ¹⁷Te núu xíní-ó càda-o sá vaha te ñà túú quide-o, te cùu-xi ìⁿ cuéchi núú-gã.

Tnúhu sá dátüha ñaha xìi nchaa ñáyi-u cuica ñà túú sàndáá iní tnúhu Yá Ndiöxí

5 ¹Te nchòhó ñáyi-u cuica ñáyi-u cuihna iní-xi cundedóho-ndo tnúhu na càháⁿ-í-a. Vitna ngúíta-ndo ndíhú iní-ndó, te ndáhyú víhí-ndó, chi quixi ìⁿ tnúndòho cuendá-ndó te ndoho vîhi-ndo. ²Te nchaa sá ndécú ndíhi-ndo ndíhi cuita tiu quíhíⁿ, te quee tíquidi dóó-ndó, ³te díhúⁿ-ndó caxi cudi ñùhu. Te xíãⁿ cuita naquiní ndeé-ndó tnúndòho sá ñà túú quide váha-ndo. Te ndíhi-ndo ndíhi díhúⁿ-ndó sã ñí taxúha-ndo, chi vitna sa ta cùyatni sáá nduu ndíhi ñuyíú-a. ⁴Te nchaa cue téé ní quide chiuⁿ núú chíúⁿ-ndó ñí ndatnúhu-ndo ndíhi-güedé nàcuáa cháhu-ndo-güedě ní cùu, te ñà túú ní chãhu-ndo-güedě nàcuáa ní xáhaⁿ-ndo xì-güedé, núu xíãⁿ ío ndècuéchi-ndo. Te Yá Ndiöxí Yaá ndécú àndiu ní tecú dóho-gá nàcuáa càháⁿ-güedé sá ñí dándàhú-ndó-güedě. ⁵Te nchòhó ñáyi-u cuica, sá ndécú vaha-ni-ndo cùndee iní-ndó, núu quide-ni-ndo nchaa sá vëxi iní-ndó. Te cùu-ndo datná ìⁿ quiti nùcuíhnu mee-ni xèxi-di, te sáá nduu sàhni-güedé-di. Te ducaⁿ sãtnahá-xi cùu nchohó chi ndècu váha-ndo vitna, te sáá ìⁿ nduu nàcháhu-ndo nchàa sá quidé-ndó núú Yá Ndiöxí te núu vá quíndáá iní-ndó-gã. ⁶Te quide úhú iní-ndó sàhni-ndo cue ñáyi-u quide ndáá núú Yá Ndiöxí, te ñà túú ñã quídě-yu.

Cunduu càhnu iní-ó te cáháⁿ ndihi-o Yă Ndiöxí

⁷Te nchòhó ñáyiu ndècu ndihi-í ichi Xítohó Jesucrìstú, cada ndee-ni ìní-ndó cùndetu-ndo ndéé ná quìxi tucu-gá ñuyíú-a, te cada-ndo dàtná quidé nchàa ñáyiu chìhi tatá chi sàcùndetú-yu ndéé cúúⁿ dǎú te chìhí-yu. Te cùndee-ni iní-yu sàcùndetú-yu ndéé cúúⁿ-gǎ dǎú te cùu itú-yu, te ndùdí ìní-yu. ⁸Te ducaⁿ càda nchohó tucu cada ndee ìní-ndó cùndetu-ndo, chi sa ta cùyatni nduu quixi tucu Xítohó Jesucrìstú. ⁹Te duha ndùu tnúhu cáháⁿ-í núú nchòhó ñáyiu ndècu ndihi-í ichi Xítohó Jesucrìstú, vá ndàcáⁿ cuéchi núú tnáhá-ndó te núu nása cùu ndecu-ndo, chi ñá cuèhé-gá nduu cùmání te quixi Crìstú nacuaca ñaha-gǎ xii-o cùndecu-o núú Yă Ndiöxí, te mee-gǎ cada ndáá-gá cuéchi-o. ¹⁰Te nchòhó ñáyiu ndècu ndihi-í ichi Xítohó Jesucrìstú, ndacu iní-ndó nàcuáa ní quide nchaa cue téé ní xóo cáháⁿ tnúhu Yă Ndiöxí ndéé sanaha sá ìo càhnu ní xínduu iní-güedé cuèi nándi ní ndoho-güedé. ¹¹Te cùtnuní iní-ó sǎ cúú-ó ñáyiu ìo váha táhú-xi te núu na càda cahnu iní-ó nchàa sá ná yǎha-o cuèndá Yă Ndiöxí. Te nàha-ndo sá ndíi Jöb ducaⁿ ní quide ndíi, chi nándi sá ní yáha ndíi te ní quide càhnu iní ndíi. Te sátá ní yáha ní ndoho ndíi, te ìo cuéhé sǎ ní sǎñaha Yă Ndiöxí xii ndíi. Chi ìo váha iní-gá te ìo cùndahú iní-gá nchaa ñáyiu ìo càhnu iní-xi.

¹²Te nchòhó ñáyiu ndècu ndihi-í ichi Xítohó Jesucrìstú, chí cùndèdóho tucu tnúhu na cáháⁿ-í-a, chi ìo xìni ñuhu-xi. Vá cǎcú nèhe-ndo Yă Ndiöxí òré cuìní-ndó sǎ cútnuní iní ñáyiu sá ndàá cada-ndo ìiⁿ sá cáháⁿ-ndó. Te ní vá cǎcú nèhe-ndo sá cǎchí-yu cùu ndióxí cǎdúha cue téé ñuyíú-a. Te núu ìiⁿ sá xìcáⁿ tnàha ñáyiu-ndo nǔú-ndó te cúñaha-ni-ndo te núu cuu àdi sá vǎ cúú. Te vá cǎcú nèhe-ndo Yă Ndiöxí, ducaⁿ te vá dándòho ñaha-gǎ xii-ndo.

¹³Te núu ndòho-ndo te cáháⁿ ndihi-ndo Yă Ndiöxí, àdi te núu ndècu váha-ndo te cudíí ìní-ndó te chiñuhu-ndo-gǎ, ¹⁴àdi núu cùhú-ndó te cana-ndo cuè téé yìndaha ñaha xii-ndo nacuáa ndècu-ndo ichi Yă Ndiöxí cuèndá tee-güedé acítí díquí-ndó, te cǎcáⁿ táhú-güedé núú-gǎ cuèndá-ndó dàtná ní cachí méé-gǎ cunduu. ¹⁵Te núu quíndáá ndisa iní-ndó sǎ ndúha-ndo, te ndúha-ndo chi Yă Ndiöxí cada tátna ñaha-gǎ xii-ndo, àdi núu ní quide-ndo ìiⁿ sá ñà túú tàú-ndó càda-ndo núú-gǎ te cada càhnu iní-gá cuéchi-ndo. ¹⁶Te xìni ñuhu-xi cútnúhu tnàha-ndo oré ñá túú cùndáá-ndó nǔú Yă Ndiöxí cuèndá chindee tnúhu tnàha-ndo cáháⁿ ndihi-ndo-gǎ te xocàni-gá cuéhé-ndó, te cada càhnu iní-gá nchaa sá ñà túú vǎha ní quide-ndo te núu cundecu váha iní-ndó. Te nchaa ñáyiu ndècu váha iní-xi núú Yă Ndiöxí na cǎcáⁿ-yu ìiⁿ sá cuìní-yu núú-gǎ te ñihí-yu, chi sǎá tnúhu-yu núú-gǎ. ¹⁷Te té Èlías, téé ní xíndecu ndéé sanaha ní cǎa-dé dàtná cǎa nchò. Te ní cáháⁿ ndihi-dé Yă Ndiöxí ní yùhu ní iní-dé ní xáhaⁿ-dǎ xii-gá sá vǎ dǎcùuⁿ-gǎ dǎú, te ní tñi-gá tnúhu ní cáháⁿ-dé, te ñá

SANTIAGO 5

ní dâcuuⁿ-gá dáú ũní cuíá dava. **18**Te dătnùní ducaⁿ te ní cáháⁿ ndihi tucu té Èliás-áⁿ Yă Ndiöxí sá dâcùuⁿ-gá dáú te ní cuuⁿ, te ní cuu tucu nchaá sá ñ xitu-güedé.

19Te nchòhó ñáyiú ndècu ndihi-í ichi Xítohó Jesucrìstú, te núu dava-ndo sà ndecu-ndo ichi Yá Ndiöxí ní cùu te ní dáñá-ndó, te ndècu tucu dava-ndo nadaxĩnu iní tnáhá-ndó nùcúndecu tucu-ndo ìchi-gá, **20**te núu ducaⁿ na càda-ndo te dâcâcu nihnu tnàha-ndo núú ùhú núú ndàhú, te mee Yă Ndiöxí cada càhnu iní ñáhá-gă xii-ndo cuëi ío cuéhé cuëchi ní quide-ndo.